

కొలోస్సియుల్క రెగిడ్లి ఉత్త్రమ్ బారిక్ జలో పవులు కొలోస్సి పట్టుమ్చ సంగుమ్చక పవులు రెగిడ్లి ఉత్త్రమ్

మొదొల్ కోడు

¹ కొలోస్సి పట్టుమ్తెచ క్రిస్తుక నంపజా జోచి నుద్ది జా జోచయ్ జల జోచి తెడి తా నిదానుమ్ జల బావుడ్లుక, ² దేముడుచి సెలవ్చి రిసా *క్రిస్తు జలో యేసుచి రిసాచి నుబుమ్ కబుర్ కామ్ కెర్తి రిసా జో దిలి అదికారుమ్ తెన్ జోచొ బారికి జలో ఆచ్ పవులు, బావొ జలో తిమోతి తెన్, రెగిడ్లి ఉత్త్రమ్.

అమ్క అబ్బొ జలో దేముడుచి దయ సేంతుమ్ తుమ్చి ఉప్పిరి తవుసు!

జేచ్ కొలోస్సి పట్టుమ్చచి రిసా పవులు జోవయించి నర్ద సంగ ప్రార్దన కెర్తె తిలిసచి కోడు

³ తుమ్చి రిసా కెయ ప్రార్దన కెర్లె కి, అమ్చొ ప్రబు జలో యేసుక్రిస్తుచొ అబ్బొన్ జలో దేముడుక తుమ్చి రిసా అమ్చి నర్ద సంగితనుమ్. ⁴ కిచ్చొక మెలె, జో క్రిస్తు యేసుచి ఉప్పిరి తుమ్ నంపతిలిసచి రిసా, పడ్డొ జోచయ్ జల నంపజలస ఎత్కిజిన్క తుమ్ ప్రేమ కెర్తెన్చి రిసా, అమ్ నూన అస్సుమ్. ⁵ పరలోకుమ్తె తుమ్చి రిసా తియఁ తిలిసి ఆసతె దెకితె తిలి రిసా, తుమ్క పెట్టి తిలి నముకుమ్చి ప్రేమచి, రిసా తుమ్ ఇసి జా అస్సున్. జా ఆసతె దెకితె తిలిసచి రిసా తుమ్ సత్తిమ్చి †కబుర్తె, మెలె నుబుమ్ కబుర్తె, అగ్గె నూన్లదు. ⁶ నుబుమ్ కబుర్ తుమ్క దొర్కు జా అయ్లి తెంతొ,

* **1:2** 1:2 'క్రిస్తు' మెలె, 'తెద్రయిందె' మెన ఎత్కి అదికారుమ్ తిలో దేముడు పూర్ణమ్ సంగిలో దొర్కు జలో రచ్చించుచ కెర్తొసా. † **1:5** 1:5 నెంజెత 'కోడుత'.

ఎక్కి తుమ్కయ్ దొర్కు జలి మెన నాయ్. ఒండి లోకుమ్తె నూనయ్ జతయ్, చి కేనె నూనయ్ జలెకి, ఆత్మపలితుమ్ జెతయ్. దస్సి, తుమ్ తొలితో నూన ప్రబుచి దయచి వరుమ్చి రిసా పూర్తి అర్దుమ్ కెరన్లి దీసి తెంతో, తుమ్తె కి నుబుమ్ కబుర్ ఆత్మపలితుమ్ జెతయ్. ⁷ ప్రేమ జలో అమ్చి తెన్ ప్రబుచో సేవ కెర్తొసా జలో ఎపప్రా, జలె, ప్రబుచి ఈంజ నుబుమ్ కబుర్ సరిగా, కిచ్చొ వేరచి నే బెదయ్తె సికడ్డికయ్, పూర్తి అర్దుమ్ కెరన్లదు. అమ్ ఒత్త గెచ్చుక నెత్తిరి రిసా జొయ్యి అమ్చి నావ్ తెన్ మెలి రితి, క్రిస్తుక నిదానుమ్ తిలో సేవ కెర్తొసా జా ఒత్త తుమ్క నుబుమ్ కబుర్ నూనవ సికడ అస్సె. ⁸ పడ్డో, ప్రబుచి ఆత్మ తుమ్చి పెట్టి దెతి తుమ్చి ప్రేమచి రిసా జో ఎపప్రా అమ్క నంగ అస్సె.

⁹ జాకయ్, తుమ్చి నముకుమ్చి అన్నె నంపజలసక చి ఉప్పిర్చి తుమ్చి ప్రేమచి రిసా, అమ్ నూన్లి దీసి తెంతో, తుమ్చి రిసా ప్రార్దన కెరుక ములుమ్ నాయ్. ఆత్మచి బుద్ది, ఆత్మతె గ్యానుమ్ ఎత్కి దేముడు తుమ్చి పెట్టి బెరవును, చి అమ్ జోచ మాన్సుల్ జా ఇండుక మెన జోచి ఇస్టుమ్ కిచ్చొ కిచ్చొ జతయ్ గే, తుమ్ పూర్తి జాన్తు మెనయ్ తుమ్చి రిసా ప్రార్దన కెర్తసుమ్. ¹⁰ జోచి ఇస్టుమ్ జాన్లె, జోచి బుద్ది గ్యానుమ్ తెన్ తిలె, ప్రబుచి విలువ దెకయ్తి రితి తుమ్ ఇండితె. దస్సి, చెంగిల్ కమొ ఎత్కితె ఇండ పలితుమ్ దెర దెర, అగ్గెచి కంట దేముడుక రోజుక ఒగ్గర్ జాన జాన, జోచి ఇస్టుమ్ రితి ఇండ ఇండ, జోక పూర్తి సర్దనంతోసుమ్ కెర్తె. ¹¹ అన్నె కిచ్చొ మెన అమ్ ప్రార్దన కెర్తసుమ్ మెలె, జోచి పరలోకుమ్చి సెక్తిక తుమ్చి పెట్టి జోచి సెక్తి బెరవ డిట్టుమ్ కెర్సు, చి తుమ్చి పెట్టి జో దెతి నంతోసుమ్క తుమ్ ఎత్కి బాదల్ సేంతుమ్ తెన్ ఒర్పుప జా నిదానుమ్ తా. ¹² ఎత్కిక అబ్బొ జలో దేముడుక తుమ్చి సర్దనంగితె. కిచ్చొక మెలె, జోచయ్ సుద్ది జల మాన్సుల్ ఎత్కిజిన్ తెన్ జోచి ఉజిడ్ రాజిమ్తెచి సొమ్మారుమ్తె అమ్క వాట సేడ్డి రితి జోవయించి దయక అమ్క విలువ దెక అస్సె. ¹³ మెలె, సయ్తాన్ ఏలువ కెర్తి అందర్ రాజిమ్ తెంతో అమ్క విడ్డల్ కెర, ప్రేమ తిలో జోచొ సొంత పుత్తున్చి రాజిమ్తె

అమ్క జో అబ్బొస్ బెదవ అస్సె. 14 మెలె, జో పుత్తున్తెయి అమ్చి రచ్చున. †అమ్ కెర్ల పాపల్ జొయ్యి చెమించుప కెర, నెతోవ గెల అస్సె.

ఎత్కిక ఆదారుమ్ జలొసొ యేసుయి

15 యేసుతె అమ్, నే డీస్తా దేముడుచి పొలిక డీస్తయ్. కీజెర్మున్ ఎత్కిక జో తొల్పుర్, జో వెల్లో. 16 కిచ్చొక మెలె, ఎత్కి కి యేసు తెన్ జెర్మున్ జలి. కేనె తిలె కి, పరలోకుమ్తె తిలె కి, బూలోకుమ్తె తిలె కి, కేన్ లోకుమ్తె తిలె కి, నే డీస్తిసి జలెకి, డీస్తిసి జలెకి, కేన్ లోకుమ్చ సిజాసనల్తె తిలస కి, ఏలుప కెర్తి సెక్తి అదికారుమ్ తిలస కి, అదికారుమ్ తిలిసి ఎత్కి, అదికారుల్ ఎత్కి, పరలోకుమ్చ జలెకి, బూలోకుమ్చ జలెకి, ఎత్కి కి జోచి అత్తి జెర్మయ్ జలి. జోచి రిసొయి జెర్మయ్ జలి. 17* ఎత్కిచి కంట తొలితో తిలొ సుదొ జొయ్యి, ఎత్కిక ఆదారుమ్ జలొసొ జొయ్యి. జో నెంజిలె, జేవ్ తత్త నాయ్.

18 పడ్డె, జోచి †ఆగ్ జల నంపజలన బెదితిన్ మొత్తుమ్క జో బోడి, జో మొదొల్. మొర్నుక జీన జితసక జో తొల్పుర్. కిచ్చొక మెలె, కిచ్చొచి రిసొ కి జో వెల్లో తంక. 19 క్రీస్తుచి పెట్టి పూర్తి తంక మెన, దేముడుచి ఇస్టుమ్ జలి. 20 పడ్డె యేసుక్రీస్తు సిలువతె అర్పితుమ్ జా జోచి లొయి సుచిలి వాటు పాపుమ్ పుంచితిన్చి సెక్తిక †బూలోకుమ్తె తిలిసి ఎత్కి, పరలోకుమ్తె తిలిసి ఎత్కి, కేన్ లోకుమ్తె తిలిసి ఎత్కి క్రీస్తుచి తెడి జేవ్ ఎత్కి జో తెన్ కీసేంతుమ్ జతి రితి అన్నె బెదవనుక మెన దేముడుచి సర్ల జలి.

యేసుచి అత్తి దేముడు బెదవన్లస

‡ 1:14 1:14 ఈంజ ఉత్తుమ్ తొలితో రెగిడ్ల సగుమ్ పున్లకల్తె కిచ్చొ అస్సె మెలె, జోచి లొయి సువ, అమ్క నెతోవ గెల అస్సె, మెలె, అమ్చి పాపుమ్ చెమించుప కెర అస్సె.

§ 1:15 1:15 నెంజిలె, 'జెర్మయ్లిసి ఎత్కిక'. గని జెర్మయ్లిసి జయె నాయ్, జో. దేముడి జా జో ఎత్కిచి కంట అగ్గెయ్ తిలొ. యోహాను 1:1-2, 14. * 1:17 1:17 'తొలితోవ' మెలె, జో తొలితో తెంతో అస్సె, చి జొయ్యి ముక్కిమ్చొ. † 1:18 1:18 ఎపెసు 1:22-23, 4:16. ‡ 1:20 1:20 రోమియుల్ 8:20-23. § 1:20 1:20 ఎపెసు 1:9-10.

21 తుమ్ కొలోస్సియుల్కి అగ్గె జోక వేరయ్ మాన్సుల్ జా, తుమ్చ ఆత్మల్తె జోక విరోదుమ్ జా తిలి రిసా వెర్రి వెర్రి కమొ కెర్తె తిలదు. 22 గని, జోచి ఆగ్గె మొర్లిన్ తెన్ తుమ్చి పాపుమ్ వయ తుమ్క కి జో బెదవన అస్సె. కిచ్చొక మెలె, తుమ్ జోచి సుద్ది జా, జోచయ్ జా, తప్పు నెంతె, కిచ్చొ గర్చికి నెంతె జా, దేముడు అబ్బొన్చి మొక్కె జో తుమ్క టీవొ కెరెదె. 23 గని జా జర్గు జంక మెలె, తుమ్ ఆత్మక డిట్టుమ్ జా జొయ్యి పునాది జతినతె టీవ, *‘పరలోకుమ్తె గెతి వాటు అమ్క దొర్కు జలి’ మెంతి దయిరిమ్ దెతి తుమ్ సూన్లి సుబుమ్ కబుర్ నే ముల్తె అన్మానుమ్ నే జతె, వేరతె నే గెతె, ప్రబుచి ఉప్పిరిచి నముకుమ్ తుమ్ నిదానుమ్ తంక. జెర్మయ్లిసి ఎత్కిక ఈంజ సుబుమ్ కబుర్ ఈంజ ఒండి లోకుమ్తె సూనయ్ జా అస్సె. ఆవ్ పవులు కి ఈంజ సుబుమ్ కబుర్ సూనయ్తి రిసా, ప్రబుచొ సేవ కెర్తొసా జా అస్సి.

24 ఆవ్ జలె, ‘తుమ్క లాబుమ్ దొర్కు జవున్’ మెన ఆవ్ †అల్లర్ సేడ్లె కి, అంక సర్ద. కిచ్చొక మెలె, ఆవ్ ఇస అల్లర్ సేడ్లిసి కిసి జతయ్ మెలె, క్రిస్తు సేడ్లె అల్లర్తె ఆవ్ బెద ఒత్త సేంసిలిసి ఆవ్ ఒర్పుప జా కుట్టయ్లి రితి జతయ్. కిచ్చొక మెలె, జోచి ఆగ్గె జల జోచయ్ సంగుమ్క ‘జోచి కబుర్ సూన్తు’ మెనయ్, ఆవ్ ఈంజేవ్ సైమల్ సేడ్లెసి. 25 జోచయ్ జల మాన్సుల్ మొత్తుమ్క ఆవ్ ఈంజ ‡సేవ కెర్తి రిసా ప్రబు అంక తెద్రవ అస్సె. దస్సి, తుమ్చి రిసా కి, అంచికోడు పూర్తి తుమ్ జానుక మెనయ్, జొయ్యి అంక తెద్రవ అస్సె. 26 జా కోడు కిచ్చొ జయెదె మెలె, ఉగల్చి ఉప్పిరి ఉగల్చ మాన్సుల్ నే సూన్తి రితి జో సీలుంకడ తిలి గుట్టు. జా అగ్గె లుంకడ తిలె కి, అప్పెయి జోక నంపజల జోచయ్ జల మాన్సుల్క జో సూనవ అస్సె. 27 తుమ్తె తెద్రయిందె మెన యూదుల్క దేముడు సంగ తిలొ దొర్కు జలొ రచ్చించుప కెర్తొసా జలొ క్రిస్తు, ఉజిడ్ తిలి గవురుమ్చి ఆస తుమ్ యూదుల్ నెంజిలనచి

* 1:23 1:23 27చి కోడు, చి 1:5చి కోడు దెక. † 1:24 1:24 జో జేలి జా తిలన్. 4:3, 10 దెక. ‡ 1:25 1:25 ఎవెసు 3:1-13. § 1:26 1:26 ఎవెసు 1:9, 3:3-4.

పెట్టి కి అస్సె. పరలోకుమతె గెతి వరుమచి దయిరిమ్ తుమ్కయ్ కి దొర్కు కెర అస్సె. జయ్యి కోడు జోచి గుట్టు జా తిలి. జా రచ్చన కెత్తిజిన్ యూదుల్ నెంజిలనక కెద్ది సొమ్నారుమ్ కెర్తయ్! కెద్ది వెల్లి కోడు, ఈంజ. జయ్యి గుట్టు జోచయ్ జల మాన్సుల్కయ్ జో జానవుక ఇస్సుమ్ జలో!

28 జలె, ఆకర్క తీర్పు జంక మెన ఎత్కిజిన్ దేముడుచి మొక్కె టీవో కెరుక మెన, క్రీస్తుక నంపజల మాన్సుల్ ఆత్మ తెన్ పూర్తి వడ్డిల మెలె, జోవయింతె ఎత్కి మాన్సు పూర్తి జా జోవయించి మొక్కె టీవో జలె, అమ్ జోవయింక బవుమానుమ్ దిలి రితి జయెదె. జాకయ్, *‘ఆత్మ తెన్ పూర్తి వడ్డుతు’ మెనయ్, క్రీస్తుచి రిసా బాల వెల్లో ఎత్కిజిన్క అమ్ నూనయ్తె తా, వేర బుద్దివోచి రిసా జాగర్త సంగితనుమ్, జోచి రిసాచి గ్యానుమ్ ఎత్కి జోవయింక సికడ్తసుమ్. 29 జోక ఆత్మక పూర్తి వడ్డుత్! మెనయ్, అంచి పెట్టి జో మొచ్చ తెన్ దెతి జోచి ఎదివాట్ సెక్తి ఎత్కి తెన్సి, పూర్తి మెన్సు దా, జోచి కామ్ ఆవ్ కెరె తత్తసి.

2

1 తుమ్చి రిసా కి, లవొదికయ పట్టుమ్చ నంపజలనచి రిసా కి, అన్సె, అంక నే దెకిల అన్నె నంపజలనక ఎత్కిజిన్చి రిసా కి, ‘ఆత్మతె వడ్డుత్’ మెన ఆవ్ కెద్ది ఆస తెన్ ఉచర్తసి గే ప్రార్దన కెర్తసి గే తుమ్ జానుక మెన అంచి ఆస. 2 తుమ్ జేవ్ ఎత్కిజిన్చి రిసా ఆవ్ కిచ్చొ మెన ఆస జతసి మెలె, జేవ్ ఎత్కిజిన్ మొత్తుమ్ ఎక్కి ప్రేమ ఎక్కి కట్టు జా జోవయించి పెట్టి దయిరిమ్ డిట్టుమ్ జతు, చి జోవయింక పూర్తి అర్దుమ్ జెయెదె, చి క్రీస్తుచి తెడి అస్సుమ్చి చెంగిల్ తమ్దె మెన పూర్తి దయిరిమ్ జవుల, చి దేముడుచి గుట్టు జానుల, మెలె క్రీస్తుకయ్ జానుల మెన తుమ్చి రిసా ఆవ్ ఆస జతసి. 3 జో క్రీస్తుచి పెట్టి బుద్ది గ్యానుమ్చి సొమ్నారుమ్ ఎత్కి ఒత్తయ్ లుంకిల్ రితి అస్సె. 4 తుమ్క కిచ్చొక ఆవ్ ఇసి సంగితసి మెలె, నూటి డిస్త తెలివి కొడె

* 1:28 1:28 ఎవెను 4:12-14.

తెన్ కా తుమ్క మోసిమ్ నే కెర్తి రితి తుమ్ జాగర్త తా. ⁵ ఆగ్గక మెలె, ఆవ్ తుమ్క దూరి అస్సి, గని ఆత్మక తుమ్చి పాసి తా, తుమ్ అప్పె సుద్ది ఇండితిసి, క్రీస్తుచి ఉప్పిర్చి తుమ్చి నముకుమ్ డిట్టుమ్ తిలిన్చి రిసా ఆవ్ సూన్లి రిసా, సర్ద తెన్ అస్సి.

⁶ జలె, ప్రబు జలొ క్రీస్తు యేసుక తుమ్ నంపజా తిలదు. ⁷ జలె, జోచితె *చెర్రో గల డిట్టుమ్ టీవొ జా తిలి రితి, చెంగిల్ గేర్ జా తంక మెన కీసి డిట్టుమ్ పునాదితె జా తంక ముక్కిమ్ మెలె, దస్సి, జో క్రీస్తు పునాది జతిన్చి ఉప్పిరి తుమ్ టీవొ డిట్టుమ్ జా, చి జోచితెడి ఆత్మతె వడ్డ, క్రీస్తుచి ఉప్పిర్చి నముకుమ్చి రిసా ఎపప్రా తుమ్క సికడ్డిసి ఎత్కి దెరన, అన్నె డిట్టుమ్ జతె తా. జో ప్రబు కెర్లె దయ ఎత్కిచి రిసా జోక తుమ్చి సర్ద దెకయ్తె తా, జోచితెడి జియ జో దెతి బుద్ధితె తుమ్ ఇండ.

⁸ తెలివి తెన్ కొణొ బెదవ వేర బోదన కెర్తిసి తెన్ రితయ్ కొణొ తెన్ మాన్సుల్ అవ్వి ఉచర్ల అలవాట్ కమె, †ఆగ్గుల్క, ఆత్మల్క, దూతల్క బూతల్క, బిత అలవాట్ కమె మాన్సుల్ సికడ తుమ్క మోసిమ్ కెరుక ఉచరుల. దసితె తుమ్ దెర్ను నే సేడ్డి రితి తుమ్ జాగర్త తా. జా క్రీస్తు సికడ్డిసి నెంజె ఈంజ లోకుమ్తె బెదితిసి.

⁹ దేముడు కిచ్చొ నే పిట్టె, జొయ్యి పూర్తి ఆగ్గ రూపుమ్ తెన్ క్రీస్తుచి పెట్టి జితయ్. ¹⁰ చి ‡అదికారుమ్ తిలిన్ ఎత్కిచి ఉప్పిరి, †అదికారుల్ ఎత్కిచి ఉప్పిరి తిలొ క్రీస్తుచి తెడి తుమ్ ఆత్మక పూర్తి దా అస్సున్.

¹¹ పూర్ముచి అలవాట్ తెన్ అమ్చ యూదుల్ 'దేముడుచ మాన్సుల్ ఆము' మెనన, జోచి సుద్ది కారిమ్చి సున్నతి కెరనుల. జా, జలె, ఎక్కి అగి జర్గు జతిసి. తూమ్, మాత్రమ్, అప్పె క్రీస్తుచి తెడి కీసి

* **2:7** 2:7 ఎపెసు 3:17 దెక. † **2:8** 2:8 నెంజలె, 'బాలబోదల్ అర్దుమ్ కెరంతి ఎదిలి గ్యానుమ్చ సిస్టులు'. ‡ **2:10** 2:10 ఆత్మల్, దూతల్, బూతల్చి అర్దుమ్ కి ఈంజేవ్ కొణొతె ఉచరుక జయెది. కొలోస్సియల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్కిక బితె తిల. § **2:10** 2:10 ఆత్మల్, దూతల్, బూతల్చి అర్దుమ్ కి ఈంజేవ్ కొణొతె ఉచరుక జయెది. కొలోస్సియల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్కిక బితె తిల.

జా అస్సుస్ మెలె, క్రీస్తుచి తెడి సుద్ది కెర్తి సున్నతి కెరన్లి రితి జా అస్సుస్. మాన్సు అగి కెరన్లి సున్నతి నెంజె, గని ఈంజ ఆగ్గేచ ఆసల్ బుద్దుల్ సింద వెంట గెలిసి. 12 క్రీస్తు మొర్లిన్ తెన్ తుమ్చి ఈంజ ఆగ్గేచ ఆసల్చి జీవ్ మొర గెలన్, ఈంజ ఆత్మజీవ్ తుమ్క కీసి దొర్కు జలి మెలె, క్రీస్తుక మొర్తన తెంతో జయణ్ణో దేముడుక సెక్తిక తుమ్ నంపజలదు. చి జో అన్నె జీవ్ జా ఉట్టిన్ తెన్ జోచి ఆత్మక తుమ్ ఆత్మజీవ్ జా ఉట్లదు. ఇన్నెచి గుర్తుక బాప్తిసుమ్ నజన్లదు.

13 పణ్ణో, తుమ్ పాపుమ్ కెర్తె తా అగ్గె ఆత్మక మొర్తనయ్ జా తిలదు, ఆగ్గేచ యూదుల్చి సుద్ది సున్నతి నెంతె తిలదు, తుమ్ దస్సి మొర్తనయ్ జా తతికయ్, దేముడు అబ్బొసి క్రీస్తుక అన్నె జయడ, జో తెన్ కి తుమ్క జయణ్ణన్. కీసి మెలె, జోక నంపజల ఎత్తిజిన్చ పాపల్ ఎత్తి అమ్క చెమించువ కెర్లన్. 14 మెలె, పూర్ణమ్ తెంతోచ ఆగ్గుల్ అమ్చి ఉప్పిరి దావ రెగిణ్ణి రితి జతయ్. గని, జా ఆగ్గుల్చి నిందల్ ఎత్తి జో దేముడు అబ్బొసి పుంచ గెలన్. కీసి మెలె, క్రీస్తు మొర్లి సిలువతె జా ఆగ్గుల్క మేకుల్ తెన్ పెట ముల దిలి రితి పుంచ గెలన్. 15 దస్సి కెర, దస ఆగ్గుల్చి నిందల్చ కోణ్ణు వయణ్ణ అమ్క పాపుమ్ సికణ్ణ ఆత్మల్, దూతల్, బూతల్, గట్రచి సెక్తి పాడ్ కెర గెల కెర, ఎత్తిచి మొక్కె జోవయింక లాజ్ కెరవ, క్రీస్తు జోవయించి ఉప్పిరి జిన్లన్. అమ్ క్రీస్తుక నంపజలసచి ఉప్పిరి దసచక కి కిచ్చొ సెక్తి నాయ్.

16 జాకయ్, కతిసిచి రిసా పితిసిచి రిసా 'ఈంజ గార్, జా గార్' మెన జవున్, నెంజెలె, 'పండుగు దీసి, ఆమస్ దీన్చి రిసా, నెంజెలె బక్తి కెర్తి సెలవ్ కణ్ణి దీసి రిసా, కిచ్చొ కిచ్చొ కెర్లె గార్' మెన తుమ్క కో నంగుత్ అవ్కాసుమ్ దాస నాయ్, సికణ్ణ సూస నాయ్. 17 పణ్ణో జర్ణు జతిన్క దసచ ఎత్తి ఎక్కి నీడ. జా నీడ గల్తొసా క్రీస్తు. 18 జాకయ్, "చువ్వె తా దూతల్ గట్రక తుమ్ జొకర" మెన కో సికణ్ణ, తుమ్ దెర్ను సేడ నాయ్. "దసచక నే జొకర్లె కిచ్చొగె పిట్టెదె" మెన బియణ్ణసక తుమ్ బియఁ నాయ్. దస కమొ సికణ్ణొసా కో జలెకు కిచ్చొక నంప కెర్తయ్ మెలె, రిత సిప్పల్క, దస్సి జోచి సొంత మెన్సు తిలిన్క 'వెల్లిచి' మెన

పుల. 19 క్రీస్తుక, మెలె బోడిక, జో మాన్సు అజ జా ముల అస్సె. జో బోడి తెన్ బెద తిలెకయ్ ఆగ్గక పుస్తి తా, అత్తుల్ నరల్ ఎత్తి తమ్మన కట్టు తెన్ తా, దేముడు దెతి జీవుకయ్ వడ్డితె తయెదె.

20 క్రీస్తు తెన్ తుమ్ బెద, జో మొర్లిన్ తెన్ బెదిల్ రితి జా, తుమ్చి ఈంజ లోకుమ్చి పాపుమ్చి మొర్లి ఆత్మ మొర, *మాయలోకుమ్చ బూతల్, దూతల్, ఆత్మల్, గట్టచి సేవ కెరుక ముల విద్దల్ జలదు జలె, కిచ్చొక జా పాపుమ్చి ఆత్మ తెన్ అప్పెక తిలి రితి ఇండితను? 21 మెలె, మాన్సుల్ వాడిక కెర కేడయ్త రిత ఆగ్గుల్చి రిసా, అలవాట్చ కమొచి రిసా 'దెరుక గారు, కంక గారు' నెంజిలె, 'చడుక గారు' మొల వెర్రి ఆగ్గుల్క కిచ్చొక బితను? 22 దసచ ఒండి మాన్సుల్ ఆరి ఉచర సికయ్లిసి. 23 మాన్సుల్ అవ్వి కెర్ల దస జాడ్లు రిత వయ్లె, సిచ్చల్ కెరలె, ఆగ్గక సిచ్చల్ కెరలె, గ్యానుమ్ రితి పున్నిమ్ రితి డీసెదె, గని అమ్చి పట్టిచి పాపుమ్బుద్దిచ ఆసల్క దస ఆగ్గుల్ ముద్దొ కెరుక నెతిరి, గెచ్చువుక నెతిర్తి.

3

పరలోకుమ్ తిలిన్క ఆస జంక

1 క్రీస్తు తెన్ తుమ్ బెద జో తెన్ జీవ్ జా ఉట్ట, జోచి ఆత్మతె తుమ్ జీవ్ జలదు. జలె, జో జీవ్ జా ఉట్ట, ఉప్పిరి, దేముడు అబ్బొన్చి ఉజెతో పక్క పరలోకుమ్తె వెస అస్సె. జాకయ్, జో ఉప్పిర్ వెస తిలిన్తెచి ఎత్తిక తుమ్ ఆస జా. 2 ఈంజ లోకుమ్తె తిలిన్క ఆస జా నాయ్. పరలోకుమ్చిక ఆస జా. 3 కిచ్చొక మెలె, ఈంజ లోకుమ్తె తుమ్ మొరయి అస్సున్, చి దేముడుచి తెడి క్రీస్తుతెయ్ తుమ్చి జీవు క్రీస్తుతె దేముడుచి తెడి లుంకడ అస్సె. 4 అమ్చి జీవు తిలొ క్రీస్తు కెయ్క అన్నె ఉత్త జా డీసెదె గే, తుమ్ కి తెదొడక జో తెన్ పరలోకుమ్చి గవురుమ్ తెన్ జతిన్తె డీన్సె.

* 2:20 2:20 నెంజిలె, 'బాలబోడల్చి ఎదిలి గ్యానుమ్చి అలవాట్ ముల....'

5 జాకయ్, తుమ్చి పెట్టి ఈంజ లోకుమ్చి బుద్దిచి కిచ్చొ జలెక తయెదె గే, జాక తుమ్ గెచ్చవ గెల; జాక మార. కీస బుద్దివొ మెలె, లంజెకమె, లంజెబుద్ది, ఆగ్చి ఆస ముద్దో నే కెరంతిసి, గార్చిచి ఉప్పిర్చి ఆస, పడ్డో అన్నె మాన్సుల్చి ఆస్తి దొర్కు కెరంతి ఆస; ఇసిచి జలె, సత్తిమ్ తిలో దేముడుక ముల వేర దేముడ్లు మెలోసొక ప్రేమ కెర్లి రితి జతయ్, జాక 'దేముడు' మెలి రితి కెర్లి బొమ్మక జొఒర కెర్లి రితి జతయ్. 6 దస కమొచి రిసా *జోచి కోడు రితి కెరుక నెసిల మాన్సుల్క దేముడుచి కోపుమ్చి సిచ్చ లయెదె.

7 అగ్గె తుమ్ జేవ్చి నెడమె జితి పొది దసచ ఎత్కి కెర ఇండితె తిలదు. 8 గని అప్పె దసచ ఎత్కి కి తుమ్క దూరి కెర. కీసచ మెలె, కోపుమ్ దెకయ్తిసి, కోపుమ్ దెరన్తిసి, కుస్సిదుమ్, దూసెనల్, వెట్కారుమ్చ కొడొ. 9 పడ్డో, ఎక్కిలోక ఎక్కిలో అబద్దుమ్ సంగ నాయ్, కెర నాయ్. కిచ్చొక మెలె ఈంజ లోకుమ్చి పాడ్ జలి ఆగ్చి జెర్మున్ ఇండితిసి కడ వెంట గెల కెర, 10 తుమ్ జేవ్క ముల, నొవి మాన్సుక గలన అస్సున్. ఈంజ గ్యానుమ్ తెన్ జా జెర్మయ్లో దేముడుచి రూపుమ్ తెన్ నొవి బుద్ది దెరన అస్సున్.

11 ఈంజ నొవి ఆత్మతె జెర్మున్ జల మాన్సుల్తె కిచ్చొ తేడల్ నాయ్. 'గ్రీసు దేసిమ్చ' మెన దేముడు సంగె నాయ్, 'యూదుల్' మెన నాయ్. 'యూదుల్చి గుర్తుచి సున్నతిచ' మెనె నాయ్, 'జా సున్నతిచ గుర్తు నెంజిలస' మెనె నాయ్, 'నేన్ల మాన్సుల్' మెనె నాయ్, 'డొంగుర్ దేసిమ్చ' మెనె నాయ్, 'గొతిమాన్సుల్' మెనె నాయ్, 'గొతి నెంజిలస' మెనె నాయ్. జోచి మొక్కె దస తేడల్ నాయ్, గని ఎత్కిజిన్క క్రిస్తుయి ముక్కిమ్, అన్నె కేన్ రగుమ్చ మాన్సుల్ జలెకి, జోచ మాన్సుల్ ఎత్కిజిన్చి పెట్టి జో అస్సె.

12 జలె, దేముడు నిసాన్ల తుమ్ జోచయ్ సుద్ది జల జో ప్రేమ కెర్లస, తుమ్ ఎత్కిజిన్ కిచ్చొ కిచ్చొ బుద్దివొ గలన మెలె, కన్కారుమ్

* 3:6 3:6 'జోవయించి' తెంతో 'మాన్సుల్క' ఎదచి కోడు ఈంజ ఉత్తమ్ తొలితో రెగిడ్ల సగుమ్ పుస్తకల్తె తయె నాయ్.

దెకితీసి, మెత్తన తతిసి, గవురుమ్ నే ఉచరంతె, అన్నె మాన్సుల్క మరియాద దెకితీసి, సేంతుమ్ తెన్ బాదల్ ఓర్పువ జా 13 ఎక్కిలోక ఎక్కిలో ఓర్పువ జతిసి. పడ్డె, కిచ్చొ జవున్ తప్పుచి రిసా ఎక్కిలో అన్నెక్కోక నింద కెరుక జతి జలె, చెమించుప కెర. ప్రబు తుమ్క కిసి చెమించుప కెర అస్సె గే, తూమ్ కి ఎక్కిలోక ఎక్కిలో చెమించుప కెరుక అస్సె.

14 ఎత్కిచి కంట ముక్కిమ్క తుమ్ కిచ్చొ బుద్ది గలన మెలె, ప్రేమయ్. కిచ్చొక మెలె, ఎత్కి ఎక్కి కట్టు తెన్ తతి రిసా ప్రేమ ఆదారుమ్ జతయ్, జయ్యి బెదెదె. 15 పడ్డె, క్రీస్తు దెతి సేంతుమ్ తుమ్చి పెట్టి ఏలుప కెర్తి రిసా వాట్ దాస. ఎక్కిలో తెన్ ఎక్కిలో సేంతుమ్ తత్తి రిసాయి జోచి ఎక్కి ఆగ్తె తుమ్ బెదుక మెన జో బుకార్లన్. పడ్డె, జో కెర్లి దయచి రిసా జోక తుమ్చి సర్ద తుమ్ దెకవ.

16 పడ్డె, క్రీస్తుచ కొడె తుమ్చి పెట్టి బస జా కామ్ కెర్తె తతి రితి తుమ్ టాన్ దాస, చి జో దెతి బుద్ది తెన్ నిదానుమ్ తెన్ ఎక్కిలోక ఎక్కిలో జోచి సత్తిమ్ సికడె తా. తుమ్తె కో పొరపాట్ నే జతి రితి బుద్ది సంగ జాగర్త సంగితె తా, చి దేముడు కెర్లి దయ ఎత్కిచి రిసా తుమ్చి సర్ద జోక దెకయ్తి రితి, జోచి గవురుమ్ సంగిత గనుమ్లు గాయితె తా. జేవ్ గనుమ్లుతె కిచ్చొ ఏక్ రగుమ్ తుమ్ గాయ మెలె, కిర్తనల్ గట్ట. 17 తుమ్ కిచ్చొ లట్టబుక జలెకి, కిచ్చొ కెరుక జలెకి, ప్రబు జలో యేసుచి నావ్ తెడి లట్టబు జవున్, జర్గు కెర జవున్, చి జోచి నావ్ తెన్ దేముడు జలో జోచొ అబ్బొన్క తుమ్చి సర్ద తుమ్ సంగ.

కేన్ గేరుచ జలెకి ఎక్కిలోక ఎక్కిలో దెకితీసి

18 తేర్బోదలు, జలె, తుమ్చ మున్సర్లుచి తెడి దాక్ కెరన, జోవయించి కోడు సూన్తె తా. ప్రబుచి తెడి అన్నున్చి ఇసి కెర్లె సూటి,†
19 మున్సర్లులు, జలె, తెర్లివొక ప్రేమ కెర, జోవయింక కుస్సిదుమ్ దెక

† 3:18 3:18 మెలె, ప్రబుచి తెడి అస్సి, చి మున్సర్లుల్క గవురుమ్ దెకిలె, ప్రబుక గవురుమ్ దెకిల్ రితి జయెదె. కొరిందల్క రెగిడ్లి ఏక్ నంబర్ ఉత్తుమ్ 11:3, ఎపెసు 5:22-24.

నాయ్. ²⁰ బోదల్ జలె, కేన్ కామ్చి రిసా జలెకి, అయ్యుస్అబ్బొసేచి కోడు సూన. 'దస్సి కెర్లెకయ్ తుమ్క చెంగిలి' మెన ప్రబుచి కోడు. ²¹ తుమ్ అబ్బుదిసి ఆరి తుమ్చ బోదల్క కోపుమ్ కెరవ నాయ్, నెంజిలె అన్మానుమ్ జా సిక్కు జవుల.

²² గొతిమాన్సుల్ జలె, కేన్ కామ్చి రిసా కి, ఈంజ లోకుమ్చ తుమ్చ ఎజొమాన్లుచి కోడు సూన, జేవ్ సంగిల్ రితి కెర. ఆరి డీసుక, మాన్సుల్క మెన్స వడంతి రిసా నాయ్, గని ఎక్కి మెన్సు ప్రబుకయ్ గవురుమ్ కెర్తి రితి తుమ్చ ఎజొమాన్లుక నిదానుమ్ సేవ కెర. ²³ కేన్ కామ్ కెరుక మెలె కి, ఎక్కి మాన్సుచి సేవ కెర్తి రితి పొన, గని ప్రబుచి సేవ కెర్తి బుద్ది తెన్ని, సర్ల తేన్ కెర. ²⁴ కిచ్చొక మెలె, తుమ్ నిదానుమ్ కెర్లి రిసాచి బావుమానుమ్క ప్రబు సొంత జోచి రాజిమ్తె వాటల్ తుమ్క దెయెదె మెన జాన్సు, గెద. దస్సి నిదానుమ్ కెర్లిసి జలె, ప్రబు జలొ క్రీస్తుచి సేవ కెర్లిసి జయెదె. ²⁵ కో పాపుమ్ కెర్లె, జోచి సిచ్చ జోక లయెదె. జో దాక్ జలెకి, వెల్లో జలెకి, అన్యె, సిచ్చ దెతిన్తె కి దేముడు కక్క మొకమాటుమ్ దెకె నాయ్, ఎజొమాన్లుక చి గొతిమాన్సుల్క జవున్ తేడల్ దెకె నాయ్.

4

'ప్రార్థన కెర్తె తా'

¹ ఎజొమాన్లు, తుమ్చ గొతిమాన్సుల్క సరిగా చెంగిల్ దెకితె తా, జోవయింక దెతిసి దాస. తుమ్క కి పరలోకుమ్తె ఎజొమాని అస్సె.

² నిదానుమ్ తెన్ బద్దుకుమ్ నే జతె దేముడుచి దయ ఎత్తిచి రిసా జోవయింక తుమ్చి సర్ల సంగ ప్రార్థన కెర్తె తా. ³ అమ్చి రిసా కి ప్రార్థన కెర. కిచ్చొక మెలె, అమ్ కిసి గే జోవయించి సుబుమ్ కబుర్ కోడు,

మెలె క్రీస్తుచి రిసాచి * గుట్టు, అమ్ నూనయ్తె తతి రిసా, జో అమ్క వాట్ దెవుసు మెన ప్రార్దన కెర. జా సుబుమ్ కబుర్ జా గుట్టు ఆవ్ నూనయ్లి రిసా ఆవ్ † జేలి జా అస్సి. 4 జా సుబుమ్ కబుర్ జా గుట్టు అన్నె నూనవుక అస్సి, చి ఆవ్ కీసి సంగిలె సొస్టుమ్ జయెదె గే జో అంక సికడ్సు మెన తుమ్ ప్రార్దన కెర.

మరియాద తెన్ ఇండ, లట్టబా

5 తుమ్క దిలి సమయుమ్ పాడ్ నే కెరంతి రితి, దేముడుచి క్రీస్తుచి గవురుమ్ దెకయ్త అవ్కాసుమ్ గెనన్లి రితి, వేర మాన్సుల్క తుమ్ మరియాద దెకితె తా. 6 తుమ్ లట్టబ్బిసి సూటి తవున్. బమ్మ తెన్ లట్టబా నాయ్, గని సరిగా ఉచర, చెంగిల్ బెదవ, కామ్క జెతిసి లట్టబ, చి కక్క కిచ్చొ జబాబ్ దెంక గే, అజ్జ తయెదె.

7 ఆవ్ ఇన్నె కీన్ అస్సి గే, తుకికు తుమ్క జానయెదె. ప్రబుచి తెడి అమ్క జో ప్రేమ జలో బావొ జయెదె, చి నిదానుమ్ సేవ కెర్తొసా జా, అమ్చి తెన్ ప్రబుచొ గొతిమాన్సు రితొ జో జయెదె. 8 తుమ్తె ఆవ్ జోక కిచ్చొక తెద్రవ అస్సి మెలె, ఇన్నె అమ్ కీసి అస్సుమ్ గే తుమ్క జో ఒత్త సంగితి రిసా, చి తుమ్క మెన్సుతె జో దయిరిమ్ కెర్తి రిసా, 9 పడ్డొ, నిదానుమ్ తిలొ ప్రేమ తిలొ బావొ జలో తుమ్చొ సొంత మాన్సు ఒనేసిముక కి తెద్రయ్తసి. ఇన్నె జర్గు జలిసి ఎత్కి తుమ్క జేవ్ దొగుల సంగుల.

పవులు తెన్ తిలనచి ప్రేమ సంగ తెద్రయ్లిసి

* 4:3 4:3 'క్రీస్తుచి రిసాచి గుట్టు' మెన సంగిలె, క్రీస్తు రచ్చించువ కెర్తొసా జలిన్చి రిసా సంగితయ్, కొలోస్సియులు 2:2. నెంజిలె క్రీస్తుతెచి రచ్చన యూదుల్ నెంజిలసక కి దొర్కు జలిన్చి రిసా సంగితయ్, కొలోస్సియులు 1:26-27, ఎపెసు 3:3-6. నెంజిలె ఎత్కి క్రీస్తుచి తెడి ఎత్కి అదికారుమ్ తిలొ దేముడు బెదవంతిన్చి రిసా, ఎపెసు 1:9-10. † 4:3 4:3 రోమ్ పట్టుమ్తె జో జేలి జా తిలి పొది ఈంజ ఉత్తుమ్ పవులు రెగిడ్డొ, మెన ఒగ్గర్జన్ ఉచర్తతి. బారికుల్ 28:16, 30, 31 దెక. కైసరియతె కి జేలి జా తిలొ; బారికుల్ 23:25, పిలిప్పితె కి; బారికుల్ 16:23, చి యెరూసలేమ్తె; బారికుల్ 21:33. ఎపెసుతె కి మెన సగుమ్జిన్ ఉచర్తతి, గని రుజ్జు నాయ్. పిలిప్పితె చి యెరూసలేమ్తె జేలి జలిసి తొక్కి దీసల్చి.

10 ఇన్నొకో కో తుమ్క జోవయించి ప్రేమ సంగ తెద్రయ్తతి మెలె, అంచి తెన్ †జేలితె తిలో అరిస్తార్కుక, పడ్డో బర్నబాచో సల్లోసి మార్కు ఇన్నొచి రిసా అగ్గె తుమ్క కబుర్ తెద్రవ అస్సి. జో తుమ్తె అయ్లె, టాన్ దాస. 11 పడ్డో యూస్తు మెన అన్నెక్ నావ్ తిలో యేసు మెలోసా కి జోచి ప్రేమ తుమ్క సంగ తెద్రయ్తయ్. దేముడుచి రాజిమ్చి రిసాచి నుబుమ్ కబుర్ కామ్ ఆవ్ కెర్చిన్తె, ఎక్కి ఈంజేవ్ తీగ్గయ్ యూదుల్ బెద అస్తి. ఈంజేవ్ అంక ఒగ్గర్ తోడు జా అస్తి.

12 పడ్డో, క్రీస్తు జలో కీయేసుక సేవ కెర్తొసా జలో తుమ్చో సొంత మాన్సు ఎపప్రా కి తుమ్క జోచి ప్రేమ సంగ తెద్రయ్తయ్. తుమ్క 'ఆత్మక పూర్తి వడ్డ డిట్టుమ్ టీవ, పూర్తి దయిరిమ్ తెన్ ప్రబుచి ఇన్టుమ్ రితి ఇండితె తత్తు' మెన, తుమ్చి రిసా కెర్టొడ్ తెదొడి జో ప్రార్దన కెర్తె తత్తయ్. 13 జోచి రిసా ఆవ్ కిచ్చొ సాచి సంగితసి మెలె, తుమ్చి రిసా కి, లవొదికయ పట్టుమ్చచి రిసా కి, చి హియోరాసొలి పట్టుమ్చచి రిసా కి, జో ఒగ్గర్ కామ్ కెర్తయ్. 14 పడ్డో, ప్రేమ జలో డాక్టర్ జలో లూకా చి దేమా తుమ్క జోవయించి ప్రేమ సంగ తెద్రయ్తతి.

15 లవొదికయ పట్టుమ్తెచ బావుడ్లు జల నంపజలనక చి నుమ్పాక, చి జేవ్చి గెరి సబ కెర్తి సంగుమ్చక అంచి ప్రేమ సంగ. 16 పడ్డో, తుమ్తె ఈంజ ఉత్తమ్ సదు కెర సూనయ్లదు మెలె, లవొదికయ పట్టుమ్తెచ సంగుమ్తె కి సదు కెరవ సూనవ. పడ్డో, జా లవొదికయ పట్టుమ్తె సంగుమ్తె ఆవ్ తెద్రయ్లి ఉత్తమ్ తూమ్ కి సదు కెర. 17 పడ్డో, 'ప్రబు తుక దిలి కామ్ తుయి నిదాసుమ్ తెన్ పూర్తి కెర కుట్టవు' మెన అర్కిప్పుక కి తుమ్ సంగ.

18 ఆవ్ పవులు సొంత ఆతు తెన్ ఈంజ ముద్దు సంగితి ఆకర్ కోడు రెగ్గితసి. ఆవ్ జేలి జలిన్చి రిసా తుమ్ ప్రార్దన కెరుక పచ్చ నాయ్. ప్రబుచి దయ తుమ్చి తెన్ తవును!

† 4:10 4:10 జో అరిస్తార్కుక నిజుమి జేలి జా తిలో గే ఎక్కి జో పవులు తెన్ బెద జా బాద ఒర్నుప జలి రిసా దస్సి మెన్తయ్ గే నేనుమ్. § 4:12 4:12 నెంజెలి 'యేసుక గొత్తి నుదొ రితో జలో, నెంజెలి 'యేసుక గొత్తి రితో జలో'.

Kupia New Testament
Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4